

A dì 10. La matina. Vene in Collegio l'orator del Vayvoda re de Hongaria, qual ha nome Stefano doctor, episcopo Serimense, vestito damaschin negro, acompagnato da 10 zentilhomeni, tra li qual sier Santo Moro el dotor et altri dotori, e di Pregadi; qual entrato et presentato la lettera di credenza fo mandato tutti fuora et lui fece una oration latina, dicendo el suo serenissimo re Zuane lo havia mandato qui, havendo recuperà el suo regno con lo aiuto et favor del serenissimo Signor Turco, qual Ferdinando re di Bohemia lo havia occupato, et per la bona amicitia l'ha con questo illustrissimo Dominio l'ha mandato de qui a star; con altre parole etc. Il Serenissimo li rispose *verba pro verbis*; et stete assà in Collegio.

Vene el legato, per el qual fo mandato, et ordinato damatina in chiesiola esso legato et l'orator del duca de Milan con 2 spagnoli, è in questa terra, el cargo fo dato a ferier Beltrame che li trovasse, el Serenissimo zureria la paxe et liga iusta la deliberation fata in Pregadi.

Vene l'orator del marchexe de Mantoa, per haver transito de alcune robe vol mandar a Mantoa per il suo Signor. Et cussi fo fato le patente.

Da poi disnar, fo Collegio de Savi con la Signoria per balotar alcuni daci, ma mancò li Cai di XL, li quali andono, con tutta la Quarantia Criminal, Consieri da basso et Avogadori, sono et sono stati, a disnar da sier Nicolò Venier consier da basso, per le noze de la fia in sier Zuan Sagredo, qual fece un festin con donne et bel pasto; sichè non veneno in Collegio.

Fo leto l'incanto de meter tre galie al viazo de Fiandra et de Barbaria, ma per non esser tante galie grosse non se meterà quelle de Barbaria.

Morite hozi sier Piero Marzello qu. sier Giacomo Antonio el cavalier, vechio de anni; stava in caxa per non poter caminar; ha hauto grandissimi honori, et è numero 40 de li 41 fè doxe missier Leonardo Loretan, et di soi compagni restano vivi *solum* do.

327* *A dì 11.* La matina, marti. Vene il legato del papa et l'orator del duca de Milan, et ferier Beltrame spagnol; et ditto messa in capella iusta el solito, poi per Nicolò Sagudino secretario fo leto la stipulation de la paxe et lega. Et el Serenissimo zuroe *nomine Domini* sul messal la observation de ditta paxe et capitoli et liga; et fo fato uno instrumento pregado con testimoni.

Da Bologna, dil Contarini orator nostro, di 9. Come la corte del papa et Soa Santità è per

partirse et tornar a Roma, farà la via de Ancona; et l'imperador verso Siena. Per tanto sollicita el mandar presto li oratori. Scrive, el papa se havia resentito alquanto per brusor de urina. *Item*, el Gran cancelier cardinal Catinaria li havea rechiesto qualche summa de danari per esser Cesare su gran spesa; et se la Signoria vol, li manderà a tuor; et che se mandi a far la restitution de le terre tenimo in Puia. Scrive, de Fiorentini, poi el prender de elezer li tre oratori al papa, non è altro, *solum* si è ditto fiorentini esser ussiti fuora et fatto danno a le zente cesaree et morto el cavalarizo del principe di Orangie.

Di sier Gabriel Venier orator, da Bologna, di 9. Scrive come el duca se ha dolesto che spagnoli sul stado li fa più danno in questo mexe che tutti li altri etc.

Vene l'orator del Signor turco, vestito con una vesta de . . . et di sora de certo panno d'oro . . . et li soi de . . .; et tolse licentia per esser stà expedito; et da hozi indrio non li corre più spexe. Se li darà li 500 ducati d'oro venetiani et la letera al Signor, in risposta de la sua bolata d'oro. El qual partite poi per Ragusi a di . . .

Da poi disnar, fo Pregadi, et leto *lettere del capitano zeneral da mar, da Corfù, di . . .* Scrive haver hauto l'aviso de Zuan Negro da Mar-seia, che la Signoria li mandò, del corsaro francese ussito; scrive li danni fatti, et come ha mandà alcune galie verso el Sasno, et altre particolarità. La copia sarà qui avanti scritta.

Di sier Polo Nani proveditor zeneral, da Brexa, di . . . , et di rectori di Bergamo in conformità. Come li spagnoli, sono a Trezo, è passadi de quà de Adda, et sachizà una villa chiamata . . .; fato preda de animali et repassà di là. *Unde* è stà mandato a dolerse a quel capo. Ha resposto non saper di paxe, et fin che 'l non habbi aviso de l'imperator farà quel più mal che 'l potrà.

Da Verona, de sier Zuan Dolfìn proveditor zeneral, fo leto lettere. Come de Vienza era venuto li et ricevuto l'ordine de la compartition. Exequirà. Et prega li sia dato licentia aziò possi venir a repatriar.

Fu, poi leto le lettere, posto, per i Savi, una lettera a l'orator nostro Contarini a Bologna, in risposta di soe. Come havemo zurà et sottoscritto per il Serenissimo li capitoli de la paxe et liga, presente el legato, orator de Milan et ferier Beltrame, et ge la mandamo aziò la dagi et se fazi dare a lo incontro li capitoli sottoscritti et zurati per la Ce-